

**Nuummi, Sisimiuni Ilulissanilu ivigaasanik qallikkanik arsaattarfiliornissap pilersaarusiorneqarnissaanut 2012-mi Aningaasanut Inatsisissatut siunnersuummi aningaasanik immikkoortitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Niels Thomsen, Demokraatit)

**Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

**Siullermeerinnineq**

Naalakkersuisut siunnersuummut qujapput.

Timigissarnerup inuillu peqqissuunerisa pinaveersaataanerisa peqqissaataanerisalu akornanni ataqatigiittoqarnera pillugu siunnersuuteqartup pingaarnertut taakkartugai Naalakkersuisut isumaqatigaat. Tassunga atatillugu silami illullu iluanik timersortarfiit innuttaasut timigissarnissamut unammisartutullu timersornissamut periarfissaannut pingaarutilerujussuupput.

Qaqortumi arsaattarfiup ivigaaraasallip illoqarfimmiunut nutaanik periarfissiinera Naalakkersuisut maluginiarpaat. Arsaattarfimmik ivigaaraasalimmik misilittakkat qularnanngitsumik illoqarfinni allani suliniutinik tamatumunnga assingusunik naliliinermut tunngavissiisinaassapput.

Naalakkersuisut Grønlands Idræts-Forbund aamma Elite Sport Greenland qinnuigaat Nuummi, Sisimiuni Ilulissanilu arsaattarfinnik ivigaaraasalinnik pilersaarusiornissamut 2012-imi aningaasanik immikkoortitsisoqarnissaannik siunnersuut naliliiffigeqqullugu.

Grønlands Idræts-Forbund isumaqarpoq timersortarfimmut taama ittuinnarmut arsaannerinnarmut atorneqarsinnaasumut aningaasaliussassarujussuusut. Grønlands Idræts-Forbund aamma nalilivoq atuarfiit arsaattarfinnik killiliinnarmik atuisinnaasasut.

Elite Sport Greenland akivoq timersuutit amerlanerusut sungiusarfissaaleqiffiusartut inissaqannginnera piffissaqannginneraluunniit pissutigalugu. Taamaalilluni aamma sineriammi illoqarfinnut allanut timersuutinik amerlanerusunik atuutsitsilerniarneq ajornakusoorpoq. Nuna-tsinni pualavallaartut allanillu nappaatillit amerliartornerannik ajornartorsiuteqarneq tamanalu pinaveersaartinniarlugu iliuseqartoqartariaqartoq Elite Sport Greenlandimit isumaqataaffigineqarpoq. Elite Sport Greenland nalilivoq illoqarfinni ataasiakkaani arsaattarfinnik ivigaaraasalinnik pisariaqartitsisoqarneraninngarnit sineriak tamakkerlugu timersortarfinnik pitsaasunik amerlanerusunik pisariaqartitsisoqarnerusoq.

Siunnersuuteqartup oqaatigaa arsaattarfimmik ivigaaraasalimmik ingerlatsineq kommuninut ataatsimoortumik tapiissutigut akilerneqarsinnaasut, tassami maanna Nuummi, Sisimiuni Ilulissanilu arsaattarfiusunik ingerlatsineq aserfallatsaaliinerlu arsaattarfimmut ivigaaraasalimmut taamatulli aningaasartuutaassanganneqarmata. Naalakkersuisut isumaqarput arsaattarfiit ivigaaraasallit arsaattarfittut sioraasutulli pisariaqartitanut matussusiisinaassanngitsut

taamaattumillu ingerlatsineq aserfallatsaaliinerlu pillugit siuinnersuuteqartup tunngavigisai piunersut nalorninartorujussuulluni.

Naalakkersuisut KANUKOKA suleqatigalugu kultureqarnermi sunngiffimmilu ingerlatsineq pillugu peqqussutip iluarsanneqarnera aallartippaat. Peqqussummi kapitali 9 ininut illullu iluani atortorissaarutinut tunngasoq naapertorlugu Naalakkersuisut timersortarfinnik pilersitsinermut iluarsaanermullu tapiissuteqarsinnaapput. Peqqussummik iluarsaanermut atatillugu illoqarfinni nunaqarfinnilu timersortarfeqarnikkut ajornartorsiutit nalinginnaasut ilaatinneqarsinnaapput. Qaqortumi arsaattarfimmik ivigaaraasalimmik sananermi, kiisalu ingerlatsinermi aserfallatsaaliinermilu misilittakkat sulinermut aamma ilanngunneqarsinnaassapput.

Paasissutissat saqqummiunneqartut aallaavigalugit kiisalu timersortartut kommunillu oqaloqatigeqqitsinnagit Naalakkersuisut aalajangiiffigisassatut siunnersuummut taamatut iluseqartilugu tapersiisinnaanngillat taamaattumillu Naalakkersuisut inassutigaat siunnersuut akuerineqassanngitsoq.